

四庫全書

集部

欽定四庫全書

集部
文毅集

目錄
卷一至
四

詳校官檢討

臣

羅國俊

中書

臣

劉源溥覆勘

總校官庶吉士

臣

何思鈞

校對官中書

臣

吳裕德

謄錄監生

臣

沈希曾

欽定四庫全書

集部六

文毅集

別集類五 明

提要

臣等謹案文毅集十六卷明解縉撰縉字大紳吉水人洪武戊辰進士永樂初官翰林學士出為江西參議改交趾為漢王高煦所譖下獄死事蹟具明史本傳縉所著有白雲稿東山集太平奏疏等書歿後多散佚天順初

金城黃諫始輯其遺文為三十卷後亦漸湮
嘉靖中同邑羅洪先復與縉從孫相輯成十
卷千頃堂書目又載有似羅隱集一卷學士
集二十卷今並未見此本十六卷則康熙戊
戌其十世孫悅所補輯也縉才氣放逸下筆
不能自休當時有才子之目迄今委巷流傳
其少年夙慧諸事率多鄙誕不經故李東陽
懷麓堂詩話謂其詩無全稿真偽相半蓋出

於後人竄亂者為多然其中佳句間存亦復
不減作者至其奏議如大庖西封事白李善
長寃諸篇俱明白凱切黃汝亨狂言紀畧詆
其文議繁偶使當賈長沙直是奴隸苛矣又
案大庖西封事中有云陛下好觀韻府雜書
批輯穢蕪畧無文彩若喜其便於檢閱願集
一二儒英隨事類別勒成一經云云其後成
祖修永樂大典縉實為總裁官果用分韻編

類之法勒為巨帙一切遺文墜簡竟賴以傳
於今日以待

聖朝之表章即以功在典籍而論其著作亦宜存
錄可不必銖銖兩兩而繩之也乾隆四十三年
五月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

集部六

文毅集目錄

別集類五明

卷一

奏疏

表

卷二

頌言

卷三

四言古

五言古

卷四

七言古

卷五

五言律

五言排律

七言律

五言絕

卷六

七言絕

卷七

序一

卷八

序二

卷九

記一

卷十

記二

卷十一

傳

行狀

卷十二

墓表

卷十三

墓誌銘

卷十四

碑

贊

卷十五

銘

書

說

卷十六

題跋

附錄

文毅集原序

大江之西山川之靈秀最多者由得天地盛大流行之
氣為多也山川之靈秀磅礴而鬱積必鍾而為人蘊乎
道德發乎文章著為事業以炳耀天下而垂萬世者非
得天地之氣為尤多者乎惟其得是氣之多實為雄偉
俊傑宏博碩大之才以垂丕隆之運而昌其所得盛大
流行之氣其宏辭鉅筆足以鋪張神藻纂叙鴻業鏗乎
有聲熠乎有光彌滿宇宙超軼前古使天下知朝廷之

大遠夷知中國之尊後世知今日之盛其為用甚博者
不本於是氣之所為乎自有元運隳光嶽之氣分至國
朝始混一西江山川靈秀所鍾而吉水解先生大紳出
焉文章始復大振故在當時天下之廣人物之衆以及
四夷之遠千百世之悠久皆知有先生者又非本諸文
章之發見乎古人之文見於經者是也豈雕琢而為之
哉其出言吐辭於論事之頃皆成文章蓋以太樸始散
淳龐大雅之氣在人猶多故也漢唐以來治雖不如古

而述作乃或有古之風者抑幸而際夫天地之氣漓而復合也以天地之氣混合而為一未有盛於今日如先生豈非得盛大流行之氣於混合之日而西江山川孕靈毓秀之所生者乎諫在童稚始知人事時即知先生名先生先謫河州河州去敝邑纔二百里諫生也晚恒以未識先生面為平生恨每得斷紙點墨以為珍玩日臨寫之如接先生於几席之上暨得所作上高廟書六十餘事及五七言詩歌讀之其論切時務其言格君心其忠

犯人主其學之瞻才識之高如布帛菽粟充溢庾藏視金玉雖貴錦繡雖美而卒有益於人國之用莫若是也其詩如古體諸篇使入太白集中孰別其為近時之作其言非雕琢其意卓然有見而非泛其氣象嚴峻凜然而有不可犯之色也豈非一代雄偉俊傑宏博碩大之才也與及來京師訪其全集於先生仲子中書舍人正亮家謂先生之於文有求輒應下筆滔滔不待思索雖千萬言頃刻立就諸作流播天下遺稿不復盡拾今存

萬無一二於是遍求大夫士家及聞人口誦而錄之共得古今詩稿百五十五首文雜體共七首為之校編成集分為六卷乃積所得俸資托宗友用和謄刻五七言絕句五十首因被命修史日趨館閣不暇為南京國子監吳祭酒與儉聞之復寄詩一集及御醫胡秉常處又得序記十餘首所未載者仍為併入又增六卷自喜所得之富蓋有待以完也今年春皇上光復寶祚諫叨進侍讀職朝回無事欲畢前工無幾使交南命又下矣茲

功不果就重為慨然秋九月使自南回過廣西龍川太平至橫州貴縣皆先生經行之地於致仕蕭教諭鳳岐諸君處共得雜文六十餘篇詩百首梧州又得廣西何布政孟煥所寄詩數首曩嘗以類廣而未考其作之先後茲於舟中按地里歲月遠近而次第之共成三十卷先生雖終交廣叅議而學士則天下人所共稱而易知者也因名曰解學士先生集先生於洪武戊辰自古來京師時中江西鄉試第一隱然名重公卿間暨登第即

蒙寵眷授中書庶吉士日侍左右諮訪政事補裨甚多
嘗進封事切中時宜皆見采納時先生年方十九毅然
以天下自任雖老成練達莫之或先比之賈誼尚少而
才亦優故高廟之待遇又遠過文帝雖百絳灌之毀而
終莫易帝意此高廟洪度如天地又豈漢文之所及哉
奈何龍去鼎湖而竟遭權臣之害遠謫西陲文廟正大
統首召為翰林侍講尋陞學士凡朝廷詔勅及大制作
大經典皆出先生手與凡大政事大議論有關國家生

民之重者先生皆與之建儲之議羽翼之功尤多其知之深信之篤任之專一時文臣未有及者雖在位不久而道行當時功施國家澤被生民聲名之在天下雖遐方異域以及千百世之遠無不知之初非待文而後顯也誠以先生得之天地鍾於山川本諸道德著為事業以炳耀天下而垂後世者必於是焉發之則先生之可傳者未必不在是也嗚呼西江山川所鍾前乎公而有歐陽修文天祥數百年後復於先生見焉使先生久於

其位其匡君澤民不在二公下使在德祐景炎之日其
精忠大節凜然不可奪又未必不與文山相頡頏也觀
平日之直言正論如所謂事有不窮之變必有不易之
主與全軀不學褚淵生嚼舌甘為杲卿死之語則先生
之心可見矣余雖未識先生而於先生之文見先生之
心讀者尚於此求之明天順元年冬十月望日賜進士
及第奉議大夫尚寶司兼翰林院侍講金城黃諫序
古今人論文曰理為主曰以載道曰昌其氣大要不出

孟子知言養氣而已古之人動靜語默無非文者豈操
觚翰而後為文也哉後世之文愈趨而愈下非文之下
也文與行岐而二之也今翰林解公大紳自生七年以
來至於今其文若干卷一時耆俊皆屬而序論之余幸
同朝讀之徒不釋手而莫措一辭其間深自咎其言未
至也因公之行以序論公之文庶幾不至於諛亦不至
於誣也聞公自幼能言惇敏超絕郡守令至其家或抱
置膝上應聲成文皆錯愕驚歎稍長小心靜密識量過

人知讀書為文皆不勞而習既敏而益勤父母惟其病之憂也時時勸之少息為文口占操筆皆立就未嘗起草其簡纔數語已足其多至萬言不窮命一題一心不厭倦而思益精到崇正學而闢異端不為支離誕謾之說不為艱難辛苦之態隨事著作洞視萬世而恥觀摹古人求其歸則未嘗異於古人也此鍾山川河漢之靈南方極盛之會天資之明大非人所可企而及矣甫十九江西以第一人貢於京師士大夫素聞其盛名相期

會連袵結駟往見公應答舉止如平常不以為異既登高第擢巍科上及東宮竒其才眷注之隆前此未有即入中書知制誥兼翰林內外制皆掌之謁告時刻上輒問安在嘗與閒語屢上封事上輒自持入其論思獻納親故莫聞而中正才敏兩制皆自以為莫及也廷辨直言聞者肅然其自處犯而不校居常恂恂尤善開導人心獎勸後學休休樂善愛人之心一息不間浩然之氣發心由理所以年甚少而巍然有碩大之望又嘗自誦

曰處其心常在熙春麗日之間則天下無可怒之人咸
以為名言公之文所以汪洋大肆而無齟齬其間正直
闕深而無偏陂之失也兼說萬有貫通而時出之浚其
源於六經要其歸於周孔雖不求工文與行如影響之
出於形聲也渾然天成卓爾出類集義養氣孳焉未已
余何足以知公之萬一哉公名縉大紳其字也其族自
唐家吉已七百餘年每舉進士必父子兄弟聯疊以為
常至宋有諱元者破烏珠累功至封王元初從祖諱誠

連三世國公其諱真我者以名進士死節贈中書平章其祖也以名進士勅修宋書諱觀者其從祖也其父元末辭參知政事為世大儒學者稱筠澗先生公生名家道授有緒姿淳穎秀望之玉立天子愛惜其德操材量與其楷書至親為之持研行草精妙絕倫善議論古事皆如目覩初與伯兄綸俱登第履歷華要遠方異域皆能誦說其名而天子每臨羣臣誦以為榮且勗勵諸王貴人皆注視之余非欲評公之文與行事如此以見公

之為文天資學問充積發見不能自己而至於如此初
非若操觚翰而學為文者之所能至也明禮部侍郎襄
陽任亨泰序

始予遊東山經三麓而後躋浮黎浮黎者東山之巔也
據是返顧培塿層疊環以百數當是時第謂高厚必資
積累理固然耳後數年友人相期於衡百里而近望其
高與東山似即而仰攀百折縈紆窮日乃至祝融之峰
自峰頂下視旁無倚附緣麓一谷橫四十里蓋拔坤維

入漢紀特立而博敷諸山非其倫也又數年入匡廬其
它不異東山獨五老峭峙得衡一體於是悟曰物固有
至鉅者乎彼名嶽者山之至鉅不由積累而高厚者也
匡以五老亦得名岳譬之形貌兩人戴立豈不矗然而
不可為鉅偏長拘行無以語聖賢之大亦猶是也夫聖
賢至矣彼略毀譽輕利害視天下事無不可為而不可
罔以世俗之見故卒應王佐而稱豪傑若是者亦謂鉅
人春雨解公幾之方高皇揮斥英雄濯拭宇宙此何時

也而公未弱冠天眷獨隆成祖之初契符魚水觀其應
制寓諷封事犯顏有鄭公之正乳兒朝貴敝屣爵位有
沅湘之奇忤權蹈危投荒厲節有太白之邁保諸忘身
徙家戍邊有東之之烈是果積累得之否乎即使未優
於聖域亦當不失為豪傑何則其才固自殊也世之知
公者淺類以詞翰賞之至論平生莫定題品伏聞仁廟
嘗曰人言解縉狂縉非狂士嗚呼非日月之明哉公亦
有言寧為有瑕玉莫作無瑕石斯固其自況矣公蒙禍

既酷藁附外氏洪先再過其下歛歔嘆息不忍輒去會
柱史遵化古松段君來江省弔古采言檄縣禮葬將刻
其遺文以傳公天才逸發援筆萬言不事屬藁而又經
籍沒故多散亡從孫桐緝錄凡十卷求加詮次稍剔其
偽不盡刪繁亦以見公不屑屑尺寸間所謂不由積累
一驗也嗚呼覽斯集者其辨人中之獄安在無徒高卑
之校也哉嘉靖壬戌春邑後學羅洪先撰

欽定四庫全書

文毅集卷一

明 解縉 撰

奏疏

大庖西封事

臣伏奉聖旨朕今命爾義則君臣恩猶父子當知無不言古云爾有嘉猷嘉謨則入告爾后于內爾乃順之于外曰斯謨斯猷惟我后之德嗚呼人臣咸若時惟良顯

哉臣謂成王於是失言矣歷觀載籍以來固以進諫之臣為善亦未嘗以納諫之主為非唐虞君臣更相勸戒更相推讓光昭不窮載為盛美昔人有譖魏徵於唐太宗者為其錄前後諫章以視起居郎褚遂良雖未必然借令有之亦足垂世臣主同休後至停婚仆碑臣竊謂太宗怒非其怒矣陛下當同符堯舜師表百王豈宜下比太宗則非臣之所願望也臣願與臯夔比肩不願與魏徵同列則臣之感恩服義懇切以為言者尤願陛下

母自狹小誠萬世一時也陛下聰明天宣一統華夷功
高萬古此放勲也得國之正皆非漢唐宋所及真所謂
取天下於羣盜救生民於塗炭命將出師皆受成筭不
假良平不倚信布徐定燕都市不易肆女寵外戚寺人
藩鎮之患銷融底定皆處之有法朕兆不萌矣不邇聲
色不為遊畋既皆遠過於漢宋又何謙遜於唐虞惟願
陛下篤惇信之本加慎獨之功登臨若對之初益加密
不覩不聞之地能無間雖處深宮之內一如郊祀之時

即前日郊祀之敬繼今日存養之功推所以愛臣之心
愛天下推所以待臣之心待萬物喜怒哀樂一聽於天
理上下四旁一視而同仁以天地為一體以天下為一
人令出惟行也不宜於數改刑期無刑也寧失於不經
蓋令數改則民疑疑則不信刑太繁則民玩玩則不清
國初至今將二十載無幾時無變之法無一日無過之
人陛下嘗教臣云世不絕賢豈億兆之人果無一賢如
古之人而盡皆不才者哉陛下嘗教臣云民不畏死奈

何以死懼之良由陛下誠信之有間而用刑之太繁也
宜其好善而善不顯惡惡而惡日滋善未必蒙福而惡
未必蒙禍也嘗聞陛下震怒鋤根剪蔓誅其奸逆矣未
聞詔書褒一大善賞延於世復及其鄉尊榮奉恩始終
如一者也或朝賞而暮戮或忽罪而忽赦施不測之辱
則有之矣誠以陛下每多自悔之時輒有無及之歎是
非私意使然也存養之功須臾少加密耳是以有過不
及也陛下天性素嚴或差於急克伐怨欲臣知陛下聖

性所無也臣見陛下好觀說苑韻府雜書與所謂道德
心經者臣竊謂甚非所宜也說苑出於劉向向之學不
純溺於誕妄所取不經且多戰國縱橫之論壞人心術
莫此為甚韻府出元之陰氏鄙猥細儒學孤識陋蠅集
一時兔園寒士抄緝穢蕪略無可采陛下若喜其便於
檢閱則願集一二志士儒英臣請得執筆而隨其後上
汴唐虞夏商周孔之興下及關閩濂洛之傳根實精明
隨事類別以備勸戒刪其無益焚其謬妄勒成一經上

接經史豈非太平制作之一端也與今又六經殘缺而禮記出於漢儒踳駁尤甚宜及時刪改日御經筵訪求審樂之儒大備百王之典作樂書一經以惠萬世以承唐虞尊祀伏羲神農黃帝堯舜禹湯文武皋陶伊尹太公周公稷契夷益傳說箕子於大學而孔子則自天子達於庶人通祀以為先師而以顏子曾子子思孟子配自閔子以下各祭於其鄉而魯之闕里仍建叔梁紇廟贈以王爵而以顏路曾皙孔鯉配一洗歷代之因仍肇

起天朝之文獻豈不盛哉若夫祀天宜復掃地之規尊祖宜備七廟之制奉天不宜為筵宴之所文淵未備夫館閣之隆太常非俗樂可肄官妓非人道所為禁絕倡優俾於變之民不遷於淫巧易置寺闍尊天子之貴不近於刑人執戟陞墀皆為吉士虎賁趣馬悉用俊良雖門戶掃除之役命公卿子弟之賢任諸侯王於衆職定久任法而加封待臣子以一體示天下之為公除山澤之禁稅蠲務鎮之征商木輅樸居而土木之工勿起佈

墾荒田而四夷之地勿貪釋老之壯者驅之俾復於人
倫經咒之妄者火之俾絕其欺誑斷所謂瑜珈之教禁
所謂符式之科絕鬼巫破淫祠汰冗員減細縣痛懲法
外之威刑永革京城之工役流十年而聽復杖八十以
無加婦女非帷簿不修毋令逮繫大臣有過惡當誅不
宜加辱治厯明時授民作事但申播殖之宜何用建除
之謬方向煞神事甚無謂孤虛宜忌亦且不經東行西
行之論天德月德之云臣料唐虞之厯必無此等之文

所宜著者日月之行星辰之次仰觀俯察事合逆順七
政之齊正此類也元首叢脞則股肱惰而萬事皆隳人
君不以察為明帝德罔愆則民志應而天命用休人君
惟以德為政陛下拳拳於畏天畏鬼神而所謂畏民者
則未至孳孳於治民治强暴而所以治心者猶未極且
案盛之潔衣服之齊修舉之時儀文之備此畏天畏鬼
神之文也豈誠足以盡事天事鬼神之道哉簿書之期
獄訟之斷詔誥之勤鈎鉅之巧此治民治强暴之末也

豈真足以盡治民治強暴之術哉古云天視自我民視
天聽自我民聽子曰聽訟吾猶人也必也使無訟乎惟
一於敬則心即天祭不必瀆而受無咎之福神不必勞
而享無為之治與天地合其德日月合其明四時合其
序而鬼神合其吉凶矣近年以來臺綱不肅果若人言
以刑名輕重為能事以問刑多寡為勲勞甚非所以勵
清要長風采也夫人自救過之不給何暇劾人之過人
自以言為諱何能有諫諍之言御史糾彈皆承密旨未

聞舉善惟曰除奸但聞上有赦宥則必故為執持意謂如此則上恩愈重而不知被赦之人疑上好諛此輩皆市井小人趨媚効勞之細術陛下何不肝膽而鏡照之哉何嘗真有一夫持法固爭謂某不當刑某當刑如舜曰殺之三臯陶曰宥之三哉臣篤知陛下輕天下之士者皆此輩無以稱塞淵衷也然誰不願其父母妻子安榮哉所以諫諍實難禍愆不測入人之罪或謂無私而出人之罪必疑受賄逢迎甚易而或蒙褒營救甚難而

多得禍禍不止於一身刑必延乎親朋誰肯捨父母妻
子而批龍鱗犯天怒哉陛下進人不擇於賢否授職不
量於重輕建不為君用之法所謂取之盡錙銖置朋姦
倚法之條所謂用之如泥沙監生進士經明行脩而多
困於州縣屈於下僚孝廉人材冥蹈瞽趨而或布於朝
省驟歷清華椎埋囂悍之夫闖茸下愚之輩朝捐刀鐏
暮擁冠裳左棄筐篋右綰組符剔履之賤袞繡巍莧負
販之傭輿馬赫奕雖曰立賢無方亦盍忱恂有德是故

賢者羞為之等列庸人悉習其風流以貪婪苟免為得計以廉潔受刑為飾辭故有無錢工役無盤纏之俚諺鬚髯官人沒商量之童謡出於吏部者無賢否之分入於刑部者無枉直之判黜陟無章舉錯乖方八議之條虛設五刑之律無常天下皆謂陛下任意喜怒為生殺而不知皆臣下之乏忠良也古者鄉隣善惡必記今雖有申明旌善之舉而無黨庠鄉學之規互知之法雖嚴訓告之方未備序禮講學必有其地有其時先之以仁

義而後之以法制則庶乎磨之有漸而行之有效如影之隨身也今也應故事立虛文善惡二字蕪穢而莫之顧長幼之民掉臂而不相揖紀綱不立節目無依勢使然也臣欲求古人治家之禮睦隣之法若古藍田呂氏之鄉約今義門鄭氏之家範布之天下世臣大族率先以勸旌之復之為民表率將見作新於變漸次時雍至於比屋可封不難矣陛下不可視為迂濶謂非當今急務也陛下天資至高悉合於道凡百家神怪誕妄恍惚

臣知陛下洞燭之矣然猶不免欲以愚弄天下若所謂以神道設教者臣謂不必然也一統之興圖已定矣一時之人心已服矣一切之奸雄已懾矣天無變災民無患害聖躬康寧聖子聖孫繼繼繩繩所謂得真符者矣何必興師以取寶為名諭衆以神仙為徵謂有某仙某神孚佐國家者哉且以傳國寶論之潞王從珂已焚之矣屢求屢得真偽莫明假令真有之則區區李斯之書秦政之制何足為寶哉周武之世未有神仙符應書之

所載可見也已而古今享國之長未有如周者神仙釋
老誕嫚恍惚何足稽哉臣觀地有盛衰物有盈歉而商
稅之徵率皆定額是使其或盈也奸黠得以侵欺其歉
也良善困於補納夏稅一也而茶椒有糧菓絲有稅既
稅於所產之地又稅於所過之津何其奪民之利至於
如此之密也且多貧下之家不免拋荒之咎或疾病死
喪逃亡棄失今日之土地無前日之生植而今日之征
聚有前日之稅糧里胥不為呈州縣不為理或賣產以

供稅產去而稅存或賠辦以當役役重而民困又土田之高下不均而起科之輕重無別或膏腴而稅反輕瘠鹵而稅反重此丈量之際里胥之弊也欲拯其困而革其弊莫若行授田均田之法兼行常平義倉之舉積之以漸至有九年之食無難者臣愚所謂願除天下之征商者此也臣聞仲尼曰王公設險以守其國故小邑必有城隍重門擊柝以待暴客聖人之所制也而近世徂於宴安隳名城銷鋒鏑禁兵諱武以為太平一旦有不

測之虞連郡至望風而靡良平不暇謀賁育不暇鬪武備
墮之過也及今修治不宜動衆但勅有司以時整葺寬之
以歲月守之以里胥額設弓手課之以弓弩兼教民兵習
之以兵農開武舉以收天下之英雄廣鄉校以延天下之
俊人古時多有書院遺基學田舊業貢士有庄義田有族
皆宜興復而廣益之夫罪人不孥罰弗及嗣連坐起於
秦法孥戮本於偽書今之為善者妻子未必蒙榮有過
者里胥必陷其罪唐虞之世四凶之罪止於流竄故殛

鯀而相禹禹不以為仇舜不以為歎況律以人倫為重而有給配婦女之條聽之於不義則又何取夫節義哉此化原之所係也孔子曰名不正則言不順故賈生欲易服色而定官名尚書侍郎內侍也而以加於六卿郎中員外何職也而以名於六屬御史詞臣所以居寵臺閣郡守縣令不應迴避鄉邦同寅協恭相倡以禮而今內外百司捶楚屬官甚於奴隸是致柔懦之徒蕩無廉恥之節擎跽曲拳於進退下氣怡色而奔趨一為下官

肌膚不保甚非所以長孝行厲節義也臣以為自今非
犯罪惡解官笞杖之刑勿用催科督厲小有過差蒲鞭
示辱亦足勸懲矣臣但知罄竭愚衷欲言固不止此奉
命忖量急於陳獻所陳略無次序亦不暇組織成文冀
以將來取譽唯陛下幸垂鑒焉

太平十策

臣聞有堯舜三代之君而法堯舜三代之治則超越唐
宋而太平千萬世者理道之必然也欽惟皇帝陛下德

侔天地誠堯舜三代之君而今之治尚未及唐宋此臣所以日夜有望於陛下也況臣蒙陛下之恩至重至厚刻骨銘心思所補報是以思當今之急務王政之大端不過十事而已一曰參井田均田之法二曰兼封建郡縣之制三曰正官名四曰興禮樂五曰審輔導之官六曰新學校之政七曰省繁冗八曰薄稅斂九曰務農十曰講武謹條陳以獻名曰太平十策惟陛下憫其愚忠少加采覽焉一曰參井田均田之法本無難事但以爲

江南地狹田少不可井治溝洫勞民而不易成且一時
動搖令民失業故歷代紛紜莫知適從唐太宗固有意
矣而無其臣周世宗亦有志矣而無其時則太平萬世
之法固有待於今日也為今之計叅井田均田之法而
行之不必拘拘於方里而井勞民動衆設溝治涂而事
事合古也宜令戶部會天下丁口若干田畝若干令民
二百丁為一里里同巷過失相規出入相友守望相助
疾病相扶持中為堂右為塾左為庠推其父老年高德

厚一人處於中堂朝夕告謁而取正焉擇其文行一人居於右塾民年八歲者入焉教以灑掃應對禮樂射御書數之文一人居於左庠民年十五者入焉教以詩書禮樂修己治人之方毋敢縱逸每丁受田若干畝廬舍邑居池井畜牧山林蔬菓之地若干畝樹藝各隨其土之所宜一里之人各治其私田若干畝而共耕公田若干畝山林畜牧之地亦如之民年二十受田老免及身後還田賣買田地則有重刑朝而畢出各事其事暮而

畢入習學左庠後為中堂婦人相聚以治女工有地狹
人稠土地硤瘠之鄉有司資以舟車給其衣食徙之江
淮之間閒曠之地孰不懽然以相從哉如此貧富何患
其不均詞訟何患其不息天下何患不治太平萬世理
有必然也一先將古人井田均田小宗之法及小學朱
子家禮顏氏家訓呂氏鄉約女教及今義門鄭氏家範
等書類聚考訂刊行天下長幼習讀有親族異產者務
要即時同居共爨如有不遵遷於化外二曰兼封建郡

縣之制夫衆建諸侯而少其力此萬世不易之論周家以是長久天下之所共知也世儒議論紛紜不足稽考為今之計異姓不可封也惟諸王所封之地宜以一縣令主治之一循古者諸侯之制擇賢以輔惟世子襲爵其庶子十歲以上者宜於水陸都會山川要害之處別封以一縣擇賢能之人輔之如此則歲有封建不過五六年之間州縣將盡為侯國而天下諸侯皆陛下子孫矣豈不萬年磐石之固哉一惟帝子封王王之嫡子襲

封王爵庶子定封侯九年考其賢者封王次賢者封公
其有過降為伯子男封地廣狹并同有無子者他國庶
子繼立務要親疏昭穆得其至當一先將古者侯國制
度考定成書刊行天下通知先給一本諸王一古人削
地之法不可行蓋削地益地後致強弱不同三曰正官
名今之六部即古之六官而尚書之官本漢朝內臣如
尚衣尚寶之類而以為六卿名實不相符矣侍郎之名
亦自不通宜改從古四曰興禮樂一今天下祭祀無樂

宜詳定頒行天下一古者庶人皆通音樂今天下和平
宜令百姓並習音樂一宜令天下訪求精曉音律通究
禮典者條陳畫圖以進一天下生員每間日習禮樂如
出榜畫圖曉示之後無能通曉者或選樂生往教或令
自求師如是數年之後今太常樂舞生及教坊司皆可
罷斥矣一禁天下胡琴羌笛一應俗樂禁庶人不可作
園社一京城及天下官路宜分為五級廣若干步中為
御道高於地若干丈其左官員儒士路一農商行路一

其右工人行路一婦人行路一使四民不收之人無自
出焉古人男婦異路亦此意也並以欄牆隔之牆高及
肩於上印刻禁戒不許參越其士農工商之人異其衣
冠使四民不收之人無容其身士緇布冠烏紗深衣漆
為之骨簪履襪以白皮布任用黑質白緣其常服許戴
今之頭巾及明帽圓領衫絲絛皂靴等生員並同農工
商賈不許農臺笠棕草任用上衣稍長下及於膝布裳履
襪以布布草任用色以皂工帽以皂皮為之布褶履

襪以布布草任用色以皂商臺笠以竹直領衫履襪白
布布草任用色以白五曰審輔導之官夫輔導諸王宜
擇方正之士以佐王王必敬而禮之朝夕諮訪今後凡
王府官宜審試之一教世子之法及左右前後之官今
皆未備宜先令搜求古法及貢生之策而行之六曰新
學校之政一每縣學生員三十人府學百人每歲春秋
二季縣之儒士試於學試中曰俊士始入縣學縣設公
宴迎榜至其家縣官親送二年各縣之生員試於府以

八月試中曰選士始入府學宴迎之禮亦如之三年鄉試會試殿試如今制始曰進士每歲府學貢十人於國學曰貢士試中縣官傳榜名至其家府縣濫取並有重罰一開科取士不用大臣保舉餘從宋制宜少取數名并賜進士及第前進士及三甲者許應一宜令天下投進詩書著述官為刊行令福建及各處書坊今國學見在書板文淵閣見在書籍參考有無盡行刊完於京城及大勝港等處官開書局就於局前立碑刻詳書目及紙墨二本令

民買販關津免稅每水陸通會州縣立書坊一所制度如前一法帖本亦宜求善本類聚刻石一本七曰省繁冗一州縣地方民戶大小不均宜均平之官員繁冗不足為治州縣繁要去處止用正官一員首領官一員僻遠去處止用一員若所用得人一人為之有餘矣一各處卷宗長幅大卷常有遺失今後每年一縣將簿十二本赴京用結勘合回縣書寫案卷其各衙門行移狀詞等項刪去繁文上用小紙勘合一張廣狹隨文多少務

要與簿相等立卷隨即粘上於簿歲終六本解赴京六
本收本處一後堂設案六隻櫥六箇吏當官前寫辦文
書一置一櫃於公廳專收文簿朝則官啟之暮則官封
之一如事多未一年而卷滿者許奏添一以里長代吏
胥禁子一年而一更此亦絕奸吏之良法也一各宜立
鑄鈔庫一偽造鈔者滋多刑之不絕宜於鈔上置半印
勘合流派字號蓋一貫一號兩貫同號真偽可辨矣八
曰薄稅歛一宜令天下錢鈔金銀穀帛金銀使用一商

賈之利有盈虧都會之地有興廢今稅有定額民必受害宜令各處稅課隨時多少從實徵收或令百姓各人戶上先行補納官收稅錢至冬均給還之則衆輕易舉官民俱利百姓無巡攔之困矣九曰務農農者天下之本而食者民之天故蓄積多而備先具兵荒水旱誠不足憂也及今天下豐歲正宜於天下要害之處每歲積糧若干民樂近輸而國受長久之利計之善者也一每一里設田畷一人以今之耆宿為之專一巡察以警勤惰

以農桑集要等書教之一先將農桑集要齊民要術及
樹藝水利等書類聚考訂頒行天下令各家通曉一義
倉之法宜悉講求即令天下民自建立則雖有水旱不
足憂矣十曰講武一宜依唐宋舊制開武科蓋郭子儀
之徒亦出於是也一古今通患郡縣無城器械不完芻
糧不給妖賊長驅所在風靡今太平之世正宜於各處
州縣皆立城池令民冬月修築就各處立武學一各處
夜則擊柝守城各處生員尤當講兵書習武事文武並

用長久之術也一軍器木石草穀宜於武學之後各置倉庫每歲成造時時檢閱務要堅良一武舉準科舉之制一國學宜高大其制環之以水春秋教以禮樂冬夏教以詩書早則升堂一揖退而會食各處其所聽其自相講貫學門之內聽其自然止禁其戲言戲動無故而出學四時之季一試有不善責令改之一不改降之下等再不改免冠責之三不改加刑焉四不改屏之遠方三年而不悔投之四裔終身不齒一將武經之屬考校而使

之習武舉定式宜參唐宋制一大將凱旋宴於學宮凡武舉之子皆令入學可用則授之以職其不才則罷黜之右十策謹如前萬一可采伏望內降手勅付大臣施行臣復竊念前者妄論邊謀干瀆聖聽戰兢累日以待斧鉞之誅蒙陛下垂憐赦其罪戾臣愈感恩浸入心骨陛下既以臣為親臣矣臣固不敢自同於衆人也若此陳獻非云報國以見臣一介愚蒙拳拳之忠耳至於臣之許國天長地久皆建功立效之時惟陛下幸垂憐之

代王國用論韓國公寃事狀

臣聞君親無將春秋誅意臣子事嫌於不軌固天下之所共誅幽明之所同憤者也然於事嫌不軌之中辨析幾微之際此禍機之所不測骨肉之所難言者惟明主能察焉竊見太師李善長與陛下同一心出萬死以得天下為勲臣第一生封公死封王男尚公主親戚皆被寵榮此人臣之分極矣志願亦已足矣天下之富貴無以復加矣若謂其自圖不軌尚未可知而今謂其欲佐

胡惟庸者揆之事理大謬不然矣人情之愛其子必甚於愛其兄弟之子安享萬金之富貴者必不肯僥倖萬一之富貴今善長於胡惟庸則姪之親耳於陛下則子之親也豈肯舍其子而從其姪哉使善長佐胡惟庸成事亦不過勲臣第一而已矣太師國公封王而已矣尚主納妃而已矣豈復有加於今日之富貴者乎且善長豈不知天命之不可倖求取天下於百戰而艱危也哉當元之季欲為此者何限莫不身為齏粉世絕宮污僅

保首領者幾人此善長之所熟見也且人之年邁氣頹精神意慮鼓舞倦矣偷安苟容則善長有之曾謂有血氣之強暴動惑其中也又其子事陛下托骨肉至親無纖芥之嫌何得忽有深讐急變大不得已之謀哉凡為此者必有深讐急變大不得已而後父子之間或至挾以求脫禍圖全耳未有平安晏然都無形迹而忽起此謀者也此理之所必然也若夫天象告變大臣當災則殺人以應天象夫豈上天之所欲哉不幸已失刑而臣

懇惻為明之猶願陛下作戒於將來也天下孰不曰功如李善長今尚如此臣恐四方之解體也且臣至疎賤非不知言出而禍必隨之然恥立於聖明之朝而無諫諍之士始者側聽私室引耳朝端意謂羣臣豈無忠智左右近侍必有為陛下言者公卿大臣必有為陛下言者臺諫御史必有為陛下言者而事寃未已羣臣杜口究無一人為陛下言者臣所以忘其疎賤冀陛下感悟臣甘就鼎鑊無所復恨矣

論袁泰奸黠狀

臣謹按袁泰本一奸兇素無學術謬登科甲忝辱憲臺
居無鄉曲之譽仕無州縣之聲獲罪刑徒尚遺賄賂侈
然自安陛下洗滌陞遷不思補報一恃權奸肆無忌憚
廉恥蕩然放僻尤甚槩其大節則不忠疏其細行則無
禮枉曲直之是非縱喜怒為輕重法所當宥則深文巧
詆必致其辜法所當刑或匿重見輕而緩其獄凡其罔
上之語盡是入人之私私賣恩惠於隱微詐受公平於

奏對心毒口甘陽助陰擠伺察淵衷轉意簧舌包藏
衆禍傾巧百端專行已意莫可誰何每有奏聞恣其
改削衆庶銜冤官僚蓄恨君恩不得下施輿情不得
上達此固天地不容人神共怒者也而况數其鄙猥
尤可羞慙久玷清華大興怨謗面目可憎素乏溫和
之氣語言難狀絕無愷悌之詞輕佻肆虐躁怒發狂
出穢詈於朝堂視同賓如奴隸微而服食之驕吝傳
播兒童之笑言貪黷穿窬恬不知恥皆奴輩小人之

金史卷一百一十五
卷一
所不為者臣將悉數其罪然不覺自慙汗心伏望發
自淵衷退人以禮解其機務投置四夷以稱唐虞之
治

表

進寶錄表

伏以聖人受命啟萬世之鴻基史氏纂書示百王之大法
是故堯舜之事載於典謨文武之政布在方策昭明日月
炳耀丹青俾文獻之足徵實古今之通義矧創業垂統

皆在於貽謀而繼志述事敢忘於紀載鼎彝有勒聖哲
相承鋪張極盛之宏休揚屬無窮之偉績歷述前聞之
作允為達孝之規欽惟太祖聖神文武欽明啟運俊德
成功統天大孝高皇帝應千年之景運集羣聖之大成
天命眷顧之隆起徒步不階於尺土人心悅服之固未
三年已定於京都龍飛雲從而華夏蠻貊罔不率服日
臨月照而山川鬼神莫不攸寧有過化存神之妙有綏
來動和之應英傑不期而會遐邇不令而從盡收當世

之賢才大拯生民於水火羣臣歸命不戮一夫元主遜
荒禮遣其嗣四方幅員之廣亘古所無中國先王之典
悉復其舊傳聖賢道學之統守帝王心法之言罷黜百
氏彌綸六經範圍化工曲成萬物天休滋至而兢業貫
乎始終諸福畢臻而謙抑統乎表裏在位之久三十餘
年升遐之日萬方哀悼比於近古邈焉罕儔漢高年不
登於中壽光武運僅紹於中興唐高祖因隋之資宋太
祖乘周之業元世祖席累世之威皆未有若此之盛者

也欽惟孝慈昭憲至仁文德承天順聖高皇后天生聖
善克相肇基側微德邁於嬪虞開創功超於胥宇永協
坤元之吉夙開文定之祥鳴鳩均衆子之恩螽斯衍百
男之應保合承天之慶簡能造化之仁厯考古之后妃
蓋莫盛於周室然摯任誕聖而無輔運之績邑姜輔運
而無誕聖之祥矧皆起於邦君或克成其世緒降及近
世皆非等倫若夫同起布衣化家為國調元翊運叅機
贊謀正位中宮十有五年慈訓昭明文德通理家邦承

式天下歸仁誕育聖躬萬世永賴自古以來未之有也
欽惟皇帝陛下體合乾坤重華日月上天申命卓然中
興煥帝堯之文章續武王之繼述孝事太祖有見而知
發蘭臺記注之書而徵以藩邸之副抽金滕石室之秘
又考於世家之藏爰當嗣位之初首頒修史之詔臣縉
總裁臣某等纂修慎選多士宴錫便蕃即開館於禁中
屢繙閱於幾暇以百人之衆厯期年之久惟務校讐之
事實無黼黻之能巍巍道冠於百王蕩蕩功超於千古

是知禮樂征伐所自必有訓誥之文雲霞華卉之生何
勞繪畫之力仰青天而瞻象緯尚奚罄於名言開玉府
而見璫璣惟自慶其希遇因文序次莫抽一辭之贊揚
據事直書永示萬年之大訓謹撰述太祖實錄一百八
十三卷繕寫成一百二十五冊謹伏闕上進臣縉等無
任瞻天仰聖慚懼屏營之至謹奉表以聞

文毅集卷一

欽定四庫全書

文毅集卷二

明 解縉 撰

頌言

河清頌 有序

臣縉承詔總裁太祖聖神文武欽明啟運俊德成功統
天大孝高皇帝實錄自渡江七年辛丑冬十一月三門
磧下黃河清實啟聖之徵帝業由是遂成明年平江漢

又明年服荆楚又明年定兩浙又明年克姑蘇廓清中原四表寧一迺即帝位紀元洪武之二年三門磧下黃河復清帝業由是而盛高麗來朝為海外諸國先殊方接武而至逾三十年皇帝陛下重華協德瑞應同符紀元永樂之二年冬十二月戊辰朔十七日甲申三門磧下黃河清先是榮光燭天隱隱紛紛倏然捲收洞徹見底淪漣五采間日迭耀乙酉之旦河兩傍近白光蕩漑如金在鎔如鉛在汞如玻璃色悠漾不定素練卷而掣之

也居二日有玄文如綃輕幕水上如犂雲隱空已迺若
漆光可鑑黝然靜深非涅而緇洞絕渣滓又二日乃見
濃綠又如翡翠如青琉璃如遠山黛繞磧下如蒼虬翠
蛟飛舞於流荇文藻之間望之而可掬也二日後如朝
霞映日紅雲上波初陽迤邐花卉紛披條如胭脂浮流
薄膩一洗下見沙石如芙蓉丹砂燦然郁列於耀瑜錦
綺之間可指而數也後二日如泥金霏屑隱約浮沉流
薄綵鳳羽毛鱗鬣泳飛潛動金芝暈文琮玉在鍊錯雜

班映瑩無纖塵又如築琥珀以為堤釀金香而注之也
已迺微碧與天一色橫渡亂流者扣舷鼓枻洞見眉髮
疑若步空凌虛倒影挽銀河而下之也於是夾河觀者
耄倪歡呼曠古罕遇自河津傳播於晉絳之人相率來
觀肩相摩也自韓城播告於秦隴之人觀者扶攜背項
相望足相躡也四方之人行旅過之莫不為之驚喜嘆
息閱玩坐起裴褰而不能去晉高平王遣使馳奏之既
而吏民報至皆圖其狀秦王上表賀獻圖與晉人允合

於是羣臣上表永樂三年春正月戊戌越十八日乙卯
迺復其舊實三旬有二日按所上圖咨詢羣言既審異
同恭惟皇帝陛下謙抑弗居謂何德臻茲稱太祖高皇
帝神靈然自陛下即位以來四方萬國之外感恩慕德
不召不約咸至於庭瑞應大來震動天地不可掩抑太
平之業由是而極盛臣縉職司紀載歡欣無已謹拜手
稽首而獻頌曰

天啟聖明休命赫奕洪河屢清龍門之碣昔在太祖廣

運神武銀河昭回洗滌九土洪河孔神佳氣協順應茲
昌運歲在辛丑雲雷構屯河清獻瑞既肇龍門天戈所
指六合風靡景貺朝宗如河之水功德格天即位紀元
龍門河清應於明年東夷始服三陲接踵如河奔趨有
赴無壅我皇繼統永樂紀元龍門河清亦越明年惟此
龍門神禹所闢功在生民宇宙無極惟茲瑞應先後同
符太祖在天昭昭不誣禹功帝德世萬世億帝德禹功
與河俱東河源崑崙太古積雪九河駿奔濺自沃鐵闢

石迴瀧盤東地底龍門天開弦激蜩起衝奔九地滅電
走影聲喧怒雷淖汨沸鼎經緯天文橫絕地紀貫一百
川羅絡萬里五行之生莫先於水四瀆之列莫大於此
於此考祥粵古是常昭茲大運塞其榮光虹飛雨翳霧
密霞流倏陽忽陰乍闕乍收其騰氤氲其下繽繽其旁
困困其隙紘紘海市青紅仙神艷淑翼鳳驂麟朝暎若
木轉盼一空伏波凝席沉沙躍金墜壤薦璧驚鷗鷁羣
下顧毛羽隔岸見魚空行曳尾星芒耀珠月影夾鏡倒

浸迴光動植交映既白既玄翕忽丹青黃旗紫蓋春卉
秋英五方歲融五緯宣精五運合一五彩流形事有絕
世久而後應物有絕倫久而後盛地闢天開多歷年所
堯舜重華卓冠萬古草木咸若卿雲爛垂千羽苗格簫
韶鳳儀於時河清榮光既塞不游不驚貢賦絡繹冀通
島夷夾石充導九河轉輸濟漯浮於積石龍門會於渭
汭匪緩而渟曷勝舟載盈變謙流時移代易不有來今
曷知古昔於昭大明聖聖相承殊音重譯日造在庭堯

舜惟欽我皇聖敬寤寐丹書典謨金鏡祥不謂祥聖不自聖惟謙受益惟仁無競洪河載清尚或如帶聖壽齊天萬世永賴河流載清龍門如礪聖壽齊天永覆萬世

御書贊

有序

右丹書義字我太祖高皇帝御書今吏部尚書詹事府詹事臣蹇義為中書舍人時洪武丁卯春三月七日賜名也十有八年於此矣義初名鎔洪武乙卯進士孝陵親擢為侍從掌外制時最重兩制官非有文章學行親

結上知不能得而得仕者亦皆合時譽義賜名後以憂去乘傳歸蜀臣縉以戊辰進士承乏詞垣兼知制誥親聞上語稱其篤實明年復起同官出示此卷俾識其下方辭讓而受命為御史監察本貫江西未暇也又明年侍父南歸縉之父載朝於京師許為之頌以勸亦不果但歸而語縉曰聖天子知人之明事必傳於世宜有以贊揚之為天下訓也縉嘗念之不敢忘茲蒙恩俱屬東宮又同官也義因復出此卷驚喜感泣不知所云尚惟

君父之遺言加以朋友之同心仰瞻奎畫之照臨益竦寸心之惕厲繼自今而臣縉臣義之心敢有一頃刻一毫釐之非義乎他日史官書之可使之得無間然之義乎贊曰

神明載興開天應期經高緯厚翊贊書詩謨明訓彰汪汪百川宣金紉玉要約一言天尊地卑非義不定人靈物生非義不成仁愛之施非義則墨禮貴適中非義則忒知有變通非義則辟忠信非義尾生守拙惟義在心

理之中正萬物是制萬物是宜裁成輔相左右範圍造化非宜聖人制之尺度權衡是有是持勿長以欲勿短以私勿以好昂勿以惡低勿高下手與人推移剛毅有執金石匪堅虹光貫日劍氣徹天人惟愛生有重於生人惟惡死有重於死惟義之歸俯仰無愧惟義之全生順死安於穆高皇天作君師殊音鼓舞庶草蕃滋矧茲近臣日轂月軌朝漸夕摩淪肌浹髓丹書煌煌婉於天光天光宵晦丹書不昧耿若河漢五緯昭迴夜光明月

拱璧瓊瑰古人命名侈言嘉瑞豈若大訓惟德惟義豈
若帝訓無偏無陂豈若丹書敬戒怠欲高皇師善惟日
不足今皇繼統圖任舊人凡昔簪履既秉衡鈞孜孜贊
贊戰戰兢兢思思義遍告在廷

嘉禾頌

有序

洪武二十有八年秋九月壬辰朔庚戌北平永清衛之
龍門禾有異莖同穗之祥其三幹合為一仍三穗者二
二穗合為一仍二穗者六是歲大熟今上為藩王時遣

使來進羣上表賀太祖聖神文武欽明啟運俊德成功
統天大孝高皇帝親御翰為詩一章以賜今上其詩首
言創業之艱天命之不易除暴禁亂之師撫民致治之
略中言天賜豐登之屢史書垂示之嚴明堂禋薦之重
末示謙冲戒謹之意為善不足之誠大矜下民之惠與
民同樂之盛心溢於言表蓋不以嘉禾為可矜而以為
可懼而思以自勉聖不自聖兢兢業業足以垂訓於千
萬年今上皇帝服膺聖訓念手澤之存諷誦追維不能

自己乃永樂三年九月朔旦用摹勒於石拓本裝治成軸分賜諸王及近臣於是臣縉亦得與賜焉又適有嘉禾之瑞臣縉仰維日月之光華昭著於天地其溢而上者為慶雲為景星為霞五色其下為璿珠為美玉為丹砂使人欣慕而寶愛者皆日月之餘光也古先聖帝明王有日月光華之德其禮樂文章流風遺韻之傳若詩書所刻百世之下光景常新猶足以使人欣慕與景星慶雲諸福之物同一快覩而況身被其澤目覩其盛鼓

舞涵濡其有不發而為華封之祝康衢之謠以自鳴其
慶幸之萬一乎爰拜手稽首而獻頌曰

洪武乙亥秋穀登朔方龍門嘉禾生三穗二穗交兩騰
異本同類同敷紫蕊珠金粟隔露凝親藩錫貢來神京
玉匣上有黃雲蒸袞衣當日御彤廷百辟忭嘉陳休徵
四野歡呼傳頌聲帝曰俞哉稽之經旅命歸禾凜不矜
作詩致戒大丁寧昌言受命畏天明降福穰穰恐弗勝
庸錫親藩鍾聖情亦知元德由茲宏十年事驗天威靈

聖孝通天推至誠永樂重華信有正賜詩日閱心屏營
手澤猶存訓服膺每御翰墨懷牆羹想當睿思玉几憑
智周八極通杳冥重念稼穡憂農耕暑寒怨咨憐獨甍
祇願年登百穀成羣臣環列忭且驚百神降鑒來軒楹
雲霞灼爍飛陶泓鴻章聖藻驅風霆造化萬彙皆流形
工巧人為何足稱奎章爛爛不可名但見東壁餘光精
刻以端溪紫玉英摹本裝以龍鸞綾頒賜羣臣荷寵榮
天球大訓河圖并人物至寶奠八紘夜夜紅光燭太清

聖子聖孫萬億齡萬世黎民歌太平

白象頌有序

粵稽成周輅之飾以象禮大夫之笏用象詩稱象掃禹
貢言齒革則象之為中國服用久矣交趾之國即唐虞
以來南交之地五服五長之所疆理以象為貢豈古昔
之常制也與惟我聖明受天明命全復唐虞成周之地
迨南交順附而馴象蕃息於輦轂之下者四十餘年矣
邇者交人作亂聖天子命將征之師行未逾時而白象

來獻臣按昔周獲白魚而勝殷漢得白麟而通西域唐
得白龜而平淮蔡白象之獻安南克平之先兆也若彼
漢晉魏唐宋九真林邑陀羅文犀之獻以為異者以求
而得之又皆無其應豈可與今日之盛相挈而擬倫哉
臣謹再拜稽首而獻詩曰

聖人垂衣朝太清四方萬國皆來庭考圖按籍一疆理
田賦貢錯稽諸經占城交趾古荒服漢唐列郡猶連城
自從宋季厯當否淪入異域誰能征蠢蠢小醜作威虐

清問赤子行天兵感茲白象來入貢執訊獲醜斯吉徵
維南巨獸有馴性視瞻四體多震驚肉豐體厚鼻卷食
齒貝側理雷紋縈時來變化比赭玉隱約有似蛟龍騰
智能拒害思報謝駕車服戟由性靈傳聞西竺多此物
治平之世來南溟黃金羅轡眩晴雪琉璃絡索分水晶
月光夜寒催立仗露珠下滴搖光星天河浴出雲浪湧
玉山迤邐空中行楊花暖風吹不起白雨一洗堆銀屏
乃知和氣有充塞地不愛寶皇華英中朝賢俊出濟濟

澤及鳥獸通幽冥鷄鳴犬吠桑柘黑百穀紛披野雲蒸
聖情謙撝勵宵旰慮及八表多鰥嫠聖德萬歲白象顧
但喜指日南交平南交赤子被聖德萬歲萬歲歌神明

文毅集卷二

欽定四庫全書

文毅集卷三

明解縉撰

四言古

解氏世系歌

悠悠我祖系出平陽後徙鴈門累葉重光迄於退翁李
唐進士諱隱官蘄德遠其子作刺吉州因家於此肅宗
之初世亂未靖同水臻善南山形勝鷓鴣迹符胥宇延

慶禹字德遠生幹宏材參軍武衛兄弟鼎台輯字德興
貞白賜諡進士兼善從美其諱金吾僕射一門皆貴桓
桓世隆自西徂東建第營寨吉陽肇封力走黃巢退不
言功子弼臯謨吳加尚書吳唐叔世家襲紫朱文燦麗
正儒將知兵保身亢宗迓宋之平希孟伯軻魁名天聖
生安及定吉甫彥聖熙寧進士吉甫參軍五子文儒持
國尤醇千齡千秋必達必文敬之諱寅世精典墳五世
辟雍世亦罕同篤於生春漕魁神童進士選川其字厚

甫龍翔天飛纂圖序譜莊山上舍忠抗姦權辰峰典教
德擬平園竹梧死節光於信史二妙同升人謂有子家
君壽考訓我奉先拜手陳詩幾千萬年

五言古

題吳山伍子胥廟

朝驅下越阪夕飯當吳門停車弔古跡靄靄林烟昏青
山海上來勢若游龍奔星臨斗牛域氣與東南吞九州
排怒濤壯哉天地根落日見海色長風捲浮雲山椒戴

遺祠興廢今猶存香殘弔木客樹古哀清猿我來久沉
抱重此英烈魂吁嗟屬鏤鋒寘爾國士冤我我姑蘇臺
荆棘曉露繁深宮麋鹿游此事誰能論因之毛髮豎落
葉秋紛紛

過曲江謁張九齡祠

停舟曲江許弔古謁遺祠偉哉始興公遺澤芬在斯堂
傾風雨萃碑斷苔蘚滋芳春莫行旅落日歸文狸唐宮
甘無事衡鑑良獨持弼諧展嘉猷讜論非詭隨雖雖朝

陽鳳粲粲補袞絲側聞臥病沒九廟烟塵飛漁陽突騎
來中華震鼓輦壯哉砥柱功用舍共安危昭陵鐵馬空
仙李祚久移惟聞蘭菊在千秋恒若茲我來薦微誠再
拜當前墀顧瞻相貌間丰度猶可師武溪何淵淵芙蓉
亦巍巍只今相業隆就與前修期臨風一長嘯山雨來
霏霏

題胡忠簡公敕書

渡江炎德衰顛倒由奸檜胡公進讜言直欲掃蕭艾居

然新州謫名震天壤內恢復事已非能保清淨退孝皇
眷先臣拔擢起滯廢羽儀廊廟間議論尤正大丘園將
佚老耿耿丹心在耆朋既凋謝一札重恩賚矯首仰乾
淳芳猷傳異代龍章儼如新字畫有餘態前修不可作
展卷一長喟

謁青陽公祠

維舟大江潯西登皖城隅遐思浩無際懷古在踟躕桓
桓青陽公忠節溢寰區堅軍守茲壘七載枕戈爰上書

久不報援絕形勢孤全家俱守死取義捐厥軀時去事
已往令名天壤俱入祠拜英姿靈爽猶儼如褒封顯幽
憤廟食揚休都起敬仰餘烈臨風發長吁媲美巡與遠
偉哉皆丈夫

墨菊

春苗茁芳露貞脆無異姿濯濯等鮮妍猗猗競華滋秋
風颯然至殞落紛蓬茨獨茲異衆艸烈士當艱危佳色
不為艷貞心常自持稟性夙已定造化無容私

題杏林精舍圖

岐黃去我久世情恒忌醫所以盧扁儔韞光隱蓬茨我
愛東垣公著述無瑕疵逝將有知己千載能求師廬陵
市闌闔同姓業在茲翩翩去炎熱寂寞山水涯再傳志
隱逸湖海自遊嬉環州結精舍種杏成陰翳開花二三
月遶天紅雨垂勃如頰霞爛郁若雲離披朱實破綠葉
金丸墜春泥未有馴虎異林密衆鳥棲鳥喧景益靜坐
起無愁思疾有不諱者問藥施與之歲久功益茂孚信

理不疑悠然順造物自詠精舍詩采椽無夢寐藻稅非
所宜戶牖洞虛敞軒楹直無敵此居成豁達足與明軒
岐我家文水上爽塏頗自怡倦遊二十載會有歸來時
醫書亦通曉杏樹陰成惟斯民躋仁壽皞皞同雍熙環
州許來往共享黃髮期

送劉日昇南遊

楓落字江雲霜侵寒夜月飄飄劉貞長揮手捐佩玦鴻
寶篋中書久作紅鑪雪近別心已遙遐思幾時輟明明

空前鏡照見絲與髮子行勿遲留出門志已豁人心不
如鏡對面異燕越佩玦無用捐贈以雙巨闕

西行寄同鄉諸友

昔與六七友頡頏麗江鄉上沂濂與洛下俯班與揚齊
聲逞逸翮萬里雲中翔都俞冀稷契熙皞窺虞唐未重
閭里選誓作邦家光榮名各忝竊進退齊軒昂周子最
英特雄劍白有芒春秋六經學明月抱文章上下數千
載歷歷陳興亡劉君事高節友誼金玉相輕財好結客

慷慨非猖狂落落遂寡合悲風激清霜於中獨步者江
夏真無雙總角貫經史下筆殊輝煌錯落燦星斗翻騰
倒湖江典章夙所習不愧瓊與香風波蕩萍梗各在天
一方十年屢屈指會晤不可常死生遂契濶悲痛切中
腸緬懷鬻熊后喧嘲孤鳳凰飲啄既孔時嚙嚙出扶桑
安定得吾弟接翅迎朝陽我行忽萬里飄飄在河湟嚴
親且百歲慈母事未襄仰天指日哭淚若東海洋雞鳴
引霜角羞逐奴輩行積雪照夜白羈孤轉淒涼侏儻邇

羌羯被服馬與羊平波漉如賴鳥鼠凌蒼蒼人掘得鼠
者此鳥悲傍徨神哉斯怪異稽首夏禹王禹功遍安豐
此土功最詳我欲事著述有筆長如扛鬼神或呵護金
石猶鏗鏘秋成買寶笈持以獻吾皇

南行寄友

結髮事明主摛文翔鳳池載筆侍帷幄衣繡當前墀煌
煌沐恩眷覲省歸庭闈十年遭運否河隴孤棲遲東還
未展翮一麾復南馳時來過鄉郡訪舊同遨嬉留連接

歡宴不忍暫相違稚子知我去寤寐牽裳衣小妾中夜
泣為言歸何時丈夫志四方離別何足悲今逢天子聖
底定如京圻多才實濟濟中外羅星棊治效日熙皞斯
民信無為自當安蹇拙守此年命奇聖恩喜謝事樂矣
不復疑壺觴集羣彥遲我從南歸

題畫

春陽忽將違紅芳坐來歇山深雲木稠流水鳴咽樓
觀隱空青幽人息環轍望來不可親未得與世別

夏雲斂虛壑輕颺散林垞
袒息坐幽宇曾無塵事撓
泉響非聒聊且均凡情騏驥
甘伏櫪飼秣便清泠物情
已俱逸樵路無商聲

秋山風露寒林莽忽摧落
山家樂餘暇賓客時剝啄
開門掃敗葉隔屋供醴酪
忘情繫城府野興轉淳朴
白雲淡無心紅樹相羅絡
山僧亦忘機逍遙俯虛壑
此景良已佳何用翔寥廓

冬嶺森瑤林積雪縞絕壁
天飛失孤鳥萬境歸一寂
何

物行路人旅騎猶歷歷天高人事異長途未遑息獨有
高居朋綸中座方適幽觀失歡喜感遇相勞逸孤舟盡
日橫桂楫空倚石立待東方暎迢遙思無極

文毅集卷三